

Awe Hilton Aruba Caribbean ta celebra 59 Aña di hospitalidad excepcional



ORANJESTAD (AAN): Aruba Caribbean Hotel a worde inaugura dia 18 di juli 1959. E tabata cariñosamente conoci como "Grand Dame" e tempo ey y e tabata ocupa y te ainda ta ocupa 15 hectar di e costa mas espectacular di nos isla na Palm Beach, cu hardinnan tropical cu ta reflesha Aruba su vegetacion indigena y un serie di comodidad luhoso.

Probechando di su arquitectura distinto y diseño di aire liber, idea originalmente di e arquitecto Estadounidense renombrado, Morris Lapidus, na fin di decada di 1950, e hotel a worde renoba completamente na fin di 2016, caminda nan a scohe muebles, accesorio y decoracion pa recaptura e era retro, bayendo back na e concepto di e hotel.

"Tabata un tarea hopi emocionante pa nos", e Gerente General Hans-Georg Roehrbein a afirma. "Tabatin masha tiki construcion y ningun cambio radical den e diseño historico di e propiedad. Aruba Growth Fund, cu ta co-propietario y ta opera e hotel, a mantene e espíritu y estilo inspira pa Caribe cu ta worde aprecia masha hopi pa e huespednan leal di e hotel." E hotel lo celebra su di 59 aniversario e zomer aki. Durante su añanan como e baluarte di hospitalidad isleño, e hotel semper a proteha su apariencia y su popularidad como un di e lugarnan pa vacacion mas gusta di Aruba.

Entre su caracteristicianan mas bunita bo ta haya un Porte Cochere den un piramide di cristal blauw, cu ta bay na e entrada caminda tin banki, diferente mata y banki di zoya.

E lobby di e Aruba Tower ta luci dos area di recepcion di Hilton Honors cu ta registra bishitantenan. E floor clasico di piedra a worde bon restaura y e lobby tin stoelman comodo, ottoman, sofa cu cuschinchi decorativo, mesa di cocktail y lampi decorativo.

E lobby concierge y e popular recepcion di De Palm Tours ta ofrece acceso facil pa haci reservacion y actividadnan.

E lobby tin un gran cantidad di obranan di arte original. Tur canvas colga den lugarnan publico y e cambenan a worde specialmente traha, enfatisando e conexion bieu/nobo di e hotel cu e isla. Mas cu 300 obra original a worde uza, tur ta basa riba potretnan y recuerdonan bieu.

Nan a worde haya di archivo y di coleccionnan priva, cu ta representa e hotel na final di añanan 60 y cuminsamento di añanan 70.

E Lobby Café, cu ta den curason di e area di recepcion ta ofrece dushi koffie di Smit & Dorlas.

E parti comercial di e lobby, Tropical Breeze y Eva Boutique, cu ta banda di Lobby Café, ta duna e localidad bida durante dia y anochi, y e entrada di e Casino su lobby ta hibabo abao na e emporio dibertido di wega. E 357 cambenan di e hotel ta inclui suites y mini suites, y cada uno tin muebles super comodo, cu ta inspira un descanso estilo Zen, cu obra di arte cu colorman harmonioso y cu tur e necesidnan tecnologico necesario incorpora den e diseño.

Mira Solo Bar, ta e popular cocktail lounge cu bista riba e matanan di Palm Beach, cu ta sirbi cocktails y cuminda light cualkier ora di dia y anochi. Sunset Grille, cu ta specialisa den carni, continuamente ta sirbi e mihor cuminda di planeta, ta worde complementa pa bistanan espectacular y ta habri pa cena tur anochi.

E piscinanan tropical di e hotel, uno anima y e otro keto, tin cabananan special, cu cama di dia, lounge seating bao di sombra, pa un dia yena di actividadnan dibertido.

Na bispera di su 59 aniversario, Aruba Growth Fund tin un compromiso firme a largo plaso cu e proyecto di e hotel, y a construi un reputacion y confianza excelente den e ultimo tres añanan di operacion.

Recordando e ceremonia inaugural di cortamento di cinta di e hotel na 2015, e palabranan cu a worde expresa pa e empresario Rene Kan, ainda ta fresco den memoria: "Mi ta hopi entusiasmo cu e futuro di e hotel aki", el a bisa. "Mi ta wak un hotel cu ta e number uno di destino di biahe na Aruba. Mi ta wak un lugar caminda nos compañeronan di ekipo ta bini pa traha y ta bay tur dia cu un sonrisa riba nan cara. Mi ta wak un hotel cual su lugar den historia no por ser lubida, pero cual futuro ta un parti integral di nos isla natal." E promesa cu a worde haci den 2015 pa continua na traha hunto pa crea experiencianan bunita pa cualkier persona cu bishita e hotel y e fantastico isla di Aruba, ta sigui di ta valido y perfectamente exacto.

